

編號 2 號

【都市大樹下個原生態】彭瑞珠原作

在厝屋下附近，有一間當大、當大間個大賣場。佢兜個停車場脢，還留等原旦種在舊工廠脢個老樹仔，樹下乜還留等一大遍個空地，分植物做得用原生態個方式自由大。佢試著，這空地有膠這間外國連鎖店加分，因為，佢有分人一種尊重臺灣植物、珍惜臺灣在地生態個感覺。

成時，佢會在樹下臥頭看，看該兜鳥仔，在高天天個樹頂，高高飛、高高奈；成時，佢會坐在停車場脢個紅毛泥矮牆，看該兜囊蜆仔、金姑仔，在高天天個大樹下，定定仔飛、慢慢仔奈。

該兜，翼還吉燥個蝶仔，乜毋使驚會分晡等佢兜、隨時都有可能搨¹過來食忒佢兜個鳥仔！因為，四圍都係人屋、車仔、大路，大路該片還有火車不時下南上北，在該確落確落²！所以，鳥仔佢兜乜想愛飛高高、較自在，係無，若係橫打直過撞著人，抑係分車仔撞著，該就衰咧！所以，這樹頂、樹下，有無共樣個生活速度、無共樣個生活方式。

¹ 搨：音 sio^ˇ；快速擊中或撞擊。

² 確落確落：音 kog^ˋ log^ˋ kog^ˋ log^ˋ；此指火車行進的聲音。

你看，該兜錢七³，在樹下放勢牯遛，遛到滿哪仔、遛到一圍牆！大賣場裡肚乜有賣錢七，幾皮仔就愛賣幾下十個銀。該，這位滿哪仔都係，仰無人摘呢？第一、該，又毋係佢個東西！第二、你毋驚，有細狗仔正滌啊過尿哦？哪有人，恁無衛生！

熱天個大樹下，該兜葉仔像分床公婆做過記號樣個冷飯藤⁴，還會開出一畝⁵畝個細白花，當得人惜！白花無恁白咧，就會間等有烏烏個細果子，安到「烏蠅屎」；這，膠佢兜發在面町個烏蠅屎無共樣，係食得得個烏蠅屎。你問佢，會去膠人偷摘來食無？該，佢無恁惹哪！就膠你講過，係有細狗仔正滌啊過尿，該毋就……，仰會恁惹呢！

冷飯藤開花咧，做得轉去姐公個山園啊，該位，乜有野生個烏蠅屎，無人洩農藥、乜毋會有狗去躡⁶。係無，佢個乜做得自家種啊，用花鉢，種出佢個自家個「原生態」來，你講係無呢？

³ 錢七：音 cien cid；洋落葵，又稱川七、藤三七、土三七等。

⁴ 冷飯藤：音 lang^ˋ pon⁺ ten；火炭母草，又稱白飯草、白飯藤、烏飯菜等。

⁵ 畝：音 po^ˋ；量詞，串。

⁶ 躡：音 lien^ˋ；反覆踩踏。

114 年全國語文競賽臺灣客語朗讀文章國小學生組（海陸腔）

編號 5 號

【一頭大樣樹】詹陽期原作

佢个老屋有一甲个山，種滄各種各樣个果作，柑仔摺檸檬係種來賣个，另外還有幾頭大梨、牛眼、荔枝、梅仔、杧仔、山楂、弓蕉這兜係種好搞个。

老屋起在半山排，係一條龍樣式个建築，對中央係廳下。屋面前有一條狹狹个山路，對山下彎彎幹幹開往上。路脣崁頂生有一頭當高大个土樣仔樹，大約有兩個大人手牽手恁粗，三、四棧樓恁高。聽阿爸講該頭樹仔對佢後生時節斯有，到今怕有四、五十年咧！

細細時節，見擺看著樣仔樹開花打子，想著過無幾久就做得食著該酸酸、甜甜又有醜醜香味个土樣仔咧，斯開始口水溶溶跌。佢兜三、四個叔伯兄弟盲到佢熟，就擎等竹篙摺打在當高个樣仔敲下來，一個人敲，其他人在路町拿網仔接。跌下來个總係比手巴掌較細隻又硬竹竹个青樣仔。摺樣仔皮刨忒，樣仔肉削薄薄搵豆油食，該味道實在湛斗。世大人長下笑佢兜講：「正經係烏鴉無隔夜卵，愁來毋掣食，盲曾盲抵斯敲敲下來，等到佢熟，驚怕伸無幾多咧！」

等到大熱天時節，歸樹滄滄青轉黃个土樣仔，在青天白雲个背景下，連同彎彎幹幹个山路，對山下遠遠看過去，斯像一幅油畫，靚到耐毋得。毋過，細人仔當豺，管佢靚毋靚，先落嘴正講。

敲樣仔係有孔竅个，細啞仔力頭毋罅，輕又硬程个細竹篙盡好上手，還愛注意个係，驚怕會有難角蟲跌下來。還愛記得敲較細枝个樹極，做毋得拓著樣仔。下背个人手腳愛溜掠，在樣仔落地泥下以前斯用網仔去接。

既經熟个樣仔蒂頭會流白白膏膏个奶，摺皮剝忒，果汁斯滲出來。遽遽歸隻送落嘴肚，用牙齒摺果肉喫下來，清香酸甜个果汁黏時流落喉嚨頭，就像在熱燻燻个天時跳落河壩搞水樣，透心涼。這斯係頭擺最好、最高級个零嗒，佢兜人豚仔一擺愛呷忒五、六隻正會過願。

毋過，十過年前，為著愛分貨車做得駛落山肚載貨，該條山路愛挪直拓寬。該頭樣仔樹閃毋過愛斬忒，該兩時歸屋下人當毋盼得。這下見擺對該條山路經過，總會回憶：「頭擺這位有一頭當高大个樣仔樹，樹下還有幾下个細啞仔，嘻嘻哈哈拈蛇打蝎个身影。」